



Մ Ա Յ Ր Ա Թ Ո Ռ Ո Ւ Մ

Սեպտեմբերի 8-ին, չորեքշաբթի, Լիբանան մեկնեցին Հոգևոր Ծեմարանի դասախոսներ գերաշնորհ Տ. Վահան Եպիսկոպոս Տերյանը և Պարգե Շահբաղյանը, 1965—1966 ուսումնական տարվա համար ուսանողներ ընտրելու:

Սեպտեմբերի 10-ին, ուրբաթ, Հոռոմ մեկնեցին Ռուսաստանի և Նոր Նախիջևանի հայոց առաջնորդ գերաշնորհ Տ. Պարգե Եպիսկոպոս Գևորգյանը և Գերագույն Հոգևոր Խորհրդի անդամ Գրիգոր Բերմեզյանը, որպես զիտորդ մասնակցելու Վատիկանի Ժողովի երրորդ նստաշրջանին:

Սեպտեմբերի 12-ին, կիրակի, «Խաչվերաց» Մայր Տաճարում հանդիսավոր սուրբ պատարագ մատուցեց լուսաբարապետ գերաշնորհ Տ. Հուսիկ Եպիսկոպոս Սանթուրյանը:

Երեկոյան, ավանդական հանդիսությամբ կատարվեց Խաչվերացի մեծ թափորը, Վեհափառ Հայրապետի հանդիսագրությամբ:

Սեպտեմբերի 13-ին, երկուշաբթի, «Յիշատակ մեռելոց» Մայր Տաճարում պատարագեց հոգեշնորհ Տ. Մուշեղ վարդապետ Պետիկյանը: Հավարտ սուրբ պատարագի, տեղի ունեցավ հոգեհանգիստ «վասն համօրէն ննջեցելոց»:

Սեպտեմբերի 13-ին, երկուշաբթի, Մայր Աթոռ յայցելեցին սիրիահայ մի խումբ զբոսաշրջիկներ: Հյուրերը եղան Մայր Տաճարում և եկեղեցական հնությունների թանգարանում: Վեհափառ Հայրապետը բարեհաճեց

Վեհարանում ընդունել հյուրերին, որոնք մեկնեցին դո՛ւ տպավորությամբ:

Սեպտեմբերի 14-ին, երեքշաբթի, Մայր Աթոռ յայցելեց Անգլիայի կուլտուրայի մինիստր տիկին Զեննի Լին: Հարգելի հյուրը եղավ Մայր Տաճարում, եկեղեցական հնությունների թանգարանում և ընդունվեց Վեհափառ Հայրապետի կողմից:

Սեպտեմբերի 16-ին, հինգշաբթի, Մայր Աթոռ յայցելեց Ֆրանսիա—ՍՍՌՄ ընկերակցության քարտուղար, զրոգ Ժան Գալալյուն: Նույն օրը Մայր Աթոռ յայցելեցին նաև հայ ուխտավորներ Արգենտինայից և ԱՄՆ-ից, ինչպես նաև զբոսաշրջիկների խումբեր Գերմանական Ֆեդերատիվ Ռեսպուբլիկայից, Լեհաստանից, ԱՄՆ-ից, Դանիայից և Գերմանական Դեմոկրատական Ռեսպուբլիկայից:

Մայր Աթոռ յայցելեց նաև բուլղարահայ երգի և պարի անսամբլը, որը համերգներով հանդես է գալիս Մայր Հայրենիքում:

Բոլոր հյուրերը եղան նաև Վեհափառ Հայրապետի մոտ:

Սեպտեմբերի 19-ին, կիրակի, Մայր Տաճարում սուրբ պատարագ մատուցեց և քարոզեց Հոգևոր Ծեմարանի վերատեսուչ հոգեշնորհ Տ. Ներսիս վարդապետ Պողապալյանը Լոռնոնում իր ուսանողական տարիների, ինչպես նաև իր այցելած սփյուռքահայ գաղութների ազգային-եկեղեցական կյանքի մասին, շեշտելով Ս. Էջմիածնի դերը սփյուռքահայ եկեղեցական կյանքի կազմակերպման աշխատանքներում:

Սուրբ պատարագին ներկա էր Վեհափառ Հայրապետը:

Սեպտեմբերի 23-ին, հինգշաբթի, որպես ուխտավոր Բուխարեստից Մայր Աթոռ ժամանեց ծանոթ մտավորական Հ. Ծ. Սիրունին:

Սեպտեմբերի 26-ին, կիրակի, «Տօն վարագայ Սրբոյ Խաչի»: Մայր Տաճարում սուրբ պատարագ մատուցեց հոգեշնորհ Տ. Գրիգոր վարդապետ Եղիայանը և քարոզեց «Խաչ քո եղիցի մեզ ապաւեն» բնաբանով:

Սուրբ պատարագին ներկա էր Վեհափառ Հայրապետը:

Հոկտեմբերի 7-ին, հինգշաբթի, Հոգևոր Ճեմարանի ուսանողները, վերատեսչի և դասախոսական կազմի ուղեկցությամբ, միօրյա ուխտագնացություն կատարեցին դեպի Աշտարակի շրջանի Մուղնու Ս. Գևորգ, Հովհաննավանք և Սաղմոսավանք սրբավայրերը:

Հոկտեմբերի 10-ին, կիրակի, Մայր Տաճարում պատարագեց Սոփիայի հայոց

հոգևոր հովիվ արժանապատիվ Տ. Մեսրոպ քահանա Բենիյանը, որն ուխտավորաբար գտնվում է Մայր Աթոռում: Պատարագիչ քահանա հայրը քարոզեց թարգմանիչ վարդապետների կյանքի և գործունեության շուրջ:

Սուրբ պատարագին ներկա էր Վեհափառ Հայրապետը:

Հավարտ սուրբ պատարագի, Վեհափառ Հայրապետի նախագահությամբ, կատարվեց հոգեհանգիստ լուսահոգի Տ. Սահակ արքեպիսկոպոս Տեր-Հովհաննիսյանի մահվան քառասունքի առթիվ:

Հոկտեմբերի 13-ին, չորեքշաբթի, էջմիածնի շրջանի իր ընտրողների հետ հանդիպման առթիվ, Մայր Աթոռ այցելեց Սովետական Միության հերոս, հայ ժողովրդի պանծալի զավակ մարաշախտ Հ. Բաղրամյանը: Հարգելի հյուրը եղավ Մայր Տաճարում և եկեղեցական հնությունների թանգարանում: Վեհափառ Հայրապետը և միաբանությունը Վեհարանում ջերմորեն ընդունեցին թանկագին հյուրին:

